



scheit es buggligs mannli da

Text: Hans Jürg Zingg

Melodie: Hans Jürg Zingg

Begleitung: Roland Scherrer/Christian Schwander

wott i vor my hustür ga
früschi luft ga tanke
scheit es buggligs mannli da
luegt mi a wi ne chranke:

*elände schnuifer am ufer vor schtrass
pumpisch dr d lunge voll giftigi gas!*

wott i zu mym brünneli ga
wott ga wasser süüffle
scheit es buggligs mannli da
chunnt mrs cho vrtüüfle:

*wasserlappi – tumme hund
zvil nitrat – pfui! nid gsund!*

wott ig i mys chucheli ga
wott my milch ga welle
scheit es buggligs mannli da
chunnt mers cho vrgälle:

*hör uuf mit milch du knilch!
chemie im vieh chemie im fuetter
chemie sogar ir milch vor muetter
bis ke möff – lah das gsöff!*

wott i zu mym öfeli ga
gmüetlech mi ga werme
scheit es buggligs mannli da
macht e grosse lärme:

*gopferglemi – dänk a ds chemi!
luftvrpeschter – lungenot – wälder chrank – bode tod*

wott a ds meer i d ferie ga
wott i ds blaue schwümme
schteit es buggligs mannli da
seit das törf i nümme

*meer geits übu – ghüderchübu
gift u gschtank – meer isch chrank
gang du d wade hei ga bade
wasser knapp – mönsch fahr ab!*

wott i uf my baukon ga
sünnele chlei u blüttle
schteit es buggligs manndli da
fat dr chopf a schüttle:

*viu z wiud gschpreyt – ozonschiud verheit
uv-strahle – höllequale
merksch de guet, win es tuet
dänksch: „o hätt!“ – aber zschpät*

wott ig i mys gärtli ga
wott ga rüebli säje
schteit es buggligs mannli da
faht grad afa chräje:

*cääääsium cääääsium – nanocuriiiie nanocuriiiie
becquerel becquerel becquerel*

wott i znacht zum schätzli rütsche
halb scho mit me schtyffe
tuet das männli mi vrwütsche
fat grad afa pfyffe

*u hämisch seits:
stop – aids !*

wott i zu mym froueli ga
wie es chindli waage
scho schteit ds männdli wider da
tuet mi lysli frage:

dänksch de nüt? – no me lüt?

wei mer zäme z chiuche ga
wie ga ds chindli toufe
chunnt is plötzlech hindena
ds bugglige manndli z loufe:

ou bim schänke gäng chlei dänke

u git mer zwe bächer:
e höuzige, ufschrift: OPFER
un e siubrige mit: VERBRÄCHER

wott i a my schrybtisch ga
wott das lied da mache
schteit das bugglige mannli da
faht grad afa lache

!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!!

aber gsunge han is trotzdäm!

(ab 1987 im Programm *Und im Aernschtfau isch es luschtig*)